



PRIMEIRU MINISTRU

**DISKURSU
SUA EXELÉNSIA PRIMEIRU-MINISTRU
KAY RALA XANANA GUSMÃO NIAN
IHA LANSAMENTU KOMERSIAL CABOS DE TIMOR-LESTE, E.P.**

Bebonuk, Díli, 28 Jullu 2026



Palácio do Governo,
Avenida Presidente Nicolau Lobato,
Díli, Timor-Leste

Exelénsias,

Membrus Governu,

Membrus korpu diplomátiku no representantes husi ita-nia parseirus dezvoltimentu,

Representantes no staff Cabos de Timor-Leste,

Distintus Konvidadus,

Señoras no Señores,

Prazer boot mai ha'u bele mai iha-ne'e ohin ba lansamentu komersial Cabos de Timor-Leste ho inísio operasoens komersiais Sistema Kabus Submarinus Sul Timor-Leste.

Ne'e loron ida ne'ebé importante tebes ba dezvoltimentu ita-nia sistema nasional telekomunikasoens.

Iha juñu 2024, ha'u ba Bebonuk selebra xegada husi primeiru kabu submarinu fibra ótika Timor-Leste.

Iha loron ne'ebá, kabu ne'e to'o duni iha ita-nia kosta. Hahú husi ne'ebá mak ita instala, liga ho halo teste.

Ohin, ita fó tan pasu importante ida, ho inísio operasaun komersial husi ativu nasional ne'e husi Kabus de Timor-Leste.

Ne'e signifika katak ita-nia país la depende barak ona ba ligasoens husi satélite ho rádiu, ne'ebé karun no ladún fiáveis.

Ne'e sei fó ba Timor-Leste asesu ba kapasidade internasional ne'ebé boot liu no proporsiona baze ba servisus internet lais liu, fiáveis liu no asesíveis liu.

Señoras no señores,

Projetu ida-ne'e iha hela dezvoltimentu iha tinan barak laran.

Iha 2012, Governu liberaliza setor telekomunikasoens. Ne'e tulun kria konkorrénsia no expande (ka, habelar) servisus móveis iha país tomak.

Alkanse servisus telekomunikasoens aumenta maka'as, inklui iha ita-nia Munisípius ho comunidades rurais.

Maibé, Timor-Leste kontinua hasoru limitasaun boot.

Ita-nia ligasoens internasionais depende barak liu ba teknolojia satélite ho rádiu. Servisu hirak-ne'e karun tebes, ho kapasidade limitada no bele afetadus tanba kondisoens meteorolójikas no interrupsoens seluk.

Tanba ne'e, mak Governu deside atu investe iha kabu submarinu internasiona ida husi fibra ótika.

Desizaun ne'e refleto vizaun ba longu prazu ne'ebé estabese ona iha Planu Estratéjiku Dezenvolvimentu ba 2011-2030.

Planu Estratéjiku Dezenvolvimentu rekoñese katak telekomunikasoens modernas esensiais tebes ba dezenvolvimentu ekonómiku, edukasaun, saúde, governasaun efikaz ho ligasaun entre ita-nia populasan no ho mundu.

Ita-nia dezenvolvimentu nasional ezije estradas, portus, aeroportus, eletrisidade, bee ho telekomunikasoens.

Buat hirak-ne'e mak hanesan aliseres bázikus ne'ebé permite ita-nia populasan konstrui ekonomia ne'ebé forte, asede ba servisu esensiais no mella sira-nia moris.

Kabu submarinu agora ne'e hanesan parte importante ida husi infraestrutura nasional. Nia propózu mak atu servi ba povu timor. Iha mundu tomak, ekskluzaun dijitál kontinua haketak país sira ne'ebé riku liu ho sira ne'ebé kiak liu no komunidadas abastadas (ka, rikas) ho sira ne'ebé menus liu rekursus.

Ekskluzaun ne'e la'ós kona de'it ba asesu ba internet. Afeta mós asesu ba edukasaun, ba informasaun, ba merkadus, ba servisu públikus no ba empregu.

Timor-Leste labele permite teknolojias foun kria tan fali forma dezigualdade ida entre família sira ne'ebé bele selu bons servisu ho sira ne'ebé la bele.

Kabu ida-ne'e fó oportunidade atu reduz dezigualdade ne'e.

Maibé ida-ne'e só bele akontese karik servisu telekomunikasoens sai asesíveis liu, karik asesu ne'e kontinua habelar no karik benefísius husi konetividade ne'ebé di'ak liu bele to'o iha eskolas, klínikas saúde, empresas ho komundade sira iha país tomak.

Susesu projetu ne'e nian sei sukat husi ninia kapasidade atu hadi'a ita-nia populasaun nia moris.

Tenke tulun alunu ho profesor sira hetan asesu ne'ebé di'ak liu ba rekursus edukativus no ba aprendizajen dijital.

Tenke tulun profisional saúde sira komunika ho espesialistas, partilla informasaun no presta servisu ne'ebé di'ak liu ba ema sira ne'ebé hela dook husi Díli.

Tenke permite timoroan sira bele asede fásil liu ba servisu públikus, hodi reduz tempu ho osan ne'ebé gasta iha dezlokasoens ba repartisoens públikas.

Tenke tulun agrikultores, kooperativas ho pekenas empresas hetan informasoens, hetan klientes foun no partisipa barak liu iha ekonomia nasional, rejional no internasional.

Tenke tulun mós ita-nia maun-alin ho feton sira ne'ebé moris iha estranjeiru atu mantein ligasaun ho sira-nia famílias no ho ita-nia país.

Governu hein katak infraestrutura ida-ne'e bele proporsiona servisu ne'ebé di'ak liu no asesíveis ba famílias, eskolas, klínikas saúde, empresas ho comunidades iha Timor-Leste tomak.

Kabu ne'e kria kondisoens ba melloria hirak-ne'e.

Cabos de Timor-Leste, fornecedores telekomunikasoens ho instituisoens públicas responsáveis agora tenke servisu hodi garante benefíciu sira bele to'o iha ita-nia populasaun.

Señoras no Señores,

Telekomunikasoens ne'ebé di'ak liu sei apoia diversifikasaun iha ita-nia ekonomia.

Timor-Leste labele depende beibeik ba reseitas petrolíferas ho despesas públicas.

Ita presiza dezenvolve setores produtivos, kria investimentu privadu no jera empregu ba ita-nia populasaun joven.

Konetividade internacional ne'ebé fiável, agora ne'e hanesan rekizitu esensial ida ba investimentus ho negósius.

Empresa sira hein hela atu bele komunika ho seguransa, transfere informasoens no opera online.

Operador turístiku sira presiza alkansa merkadus internasionais. Banku sira ho instituisoens finanseiras nesesita redes seguras no fiáveis.

Empresas ho dimensaun oioin depende barak tan ba sistemas dijitais.

Konetividade ne'ebé di'ak liu bele mós tulun kria indústrias ho formas empregu foun.

Joven timoroan sira tenke iha oportunidade atu servisu ba dezvoltimentu software, telekomunikasoens, ciberseguransa, servisu dijitais, indústrias kreativas ho áreas seluk ne'ebé kontinua buras iha mundu tomak.

Ita-nia joven sira labele hanesan de'it konsumidores teknolojia.

Sira tenke iha kompeténsias ho oportunidades atu utiliza teknolojia hodi kria negósius, presta servisu no rezolve problemas ne'ebé ita-nia país hasoru.

Tanba ne'e, mak ita-nia investimentu iha infraestruturas tenke akompaña ho investimentu iha ema.

Ita presiza enjeñeirus, técnicos, especialistas iha redes, programadores software no profesionais siberseguransa timornian.

Ita presiza edukasaun ho formasaun técnica ne'ebé bele prepara ita-nia joven sira ba karreira hirak-ne'e.

Ita presiza kooperasaun entre governu, universidades, instituisoens formasaun ho setor privadu.

Cabos de Timor-Leste iha mós responsabilidade atu desenvolve profesionais timoroan no apoia transferénsia koñesimentus no kompeténsias técnicas.

Experiénsia internacional sei kontinua importante, maibé ita-nia povu tenke iha kbiit opera, mantein no proteje rasik infraestrutura ne'e.

Hanesan ne'e mak dezvoltimentu nasional bele sai sustentável no ita-nia Estadu sai resiliente.

Señoras no Señores,

Timor-Leste liga besik liután ho ita-nia rejiaun.

Depoizde ita-nia adesaun ba ASEAN, ita tenke reforsa ita-nia ligasoens ekonómikas, institusionais no interpesoais ho países viziñus.

Konetividade dijital sei apoia komérsiu, edukasaun, kooperasaun governamental ho sirkulasaun informasaun no servisus iha rejiaun tomak.

Ita-nia ligasaun liuhusi Austrália hanesan primeiru pasu importante.

iha futuru, Timor-Leste sei dezenvolve mós ligasoens adisionais, inklui ho Indonézia no redes rejionais seluk.

Ne'e sei aumenta ita-nia kapasidade, sei reforsa reziliénsia husi ita-nia sistema telekomunikasoens no hametin ita-nia lasus ho ita-nia viziñu sira.

Importante ba ita-nia desenvolvimentu futuru, bainhira Timor-Leste bele liga di'ak liután ho ekonomias no povu sira husi Sudeste Aziátiku ho Pasífiku.

Señoras no señores,

Konetividade boot liu lori mós responsabilidade boot liu.

Internet proporsiona koñesimentu, komunikasaun ho oportunidades ekonómikas.

Maibé mós bele utiliza ba fraudes, cibercrime, explorasaun ho atakes kontra indivíduos, empresas no instituisoens públikas. Enkuantu uzu internet aumenta, ita tenke reforsa mós ita-nia kapasidade atu proteje ita-nia populasau, empresas ho instituisoens.

Governu sei kontinua dezenvolve leis, instituisoens ho kapasidades técnicas nesesárias atu kombate cibercrime, proteje informasaun pesoal no defende ita-nia sistemas nasionais.

Traballu ne'e eziye kooperasaun entre governu, empresas telekomunikasoens, instituisoens financeiras, ajências seguransa pública ho ita-nia parseirus internacionais.

Cabos de Timor-Leste tenke opera infraestrutura ne'e ho disciplina, profissionalismo no forte seguransa.

Kabu hanesan ativu nasional importante ida no tenke gere ba interesse timoroan tomak.

Señoras no señores,

Ha'u agradese ba ema sira ne'ebé kontribui ona ba projetu ida-ne'e iha tinan barak laran.

Konkista ida-ne'e ezije planeamentu ba longu prazu, koñesimentus téknikus, kooperasaun entre instituisoens ho servisu maka's husi timoroan sira hamutuk ho profisionais internasionais.

Ohin ne'e hanesan konkista importante ida, maibé presiza halo barak tan.

Ita tenke kontinua habelar asesu, mellora servisu, reduz kustus no dezenvolve kompeténsias husi ita-nia populasau.

Ita mós tenke utiliza infraestrutura ne'e hodi mellora edukasaun, saúde, administrasaun pública no oportunidades ekonómikas.

Iha juñu 2024, ita simu ho laran haksolok kabu ne'e to'o iha Timor-Leste nia kostas.

Ohin, ita hahú koloka kabu ne'e ba servisu ita-nia povu nian.

Mai ita garante atu benefísiu hirak-ne'e bele to'o iha ema hotu-hotu iha país tomak no apoia ekonomia ida ne'ebé forte liu ho Estadu ida ne'ebé reziliente liu.

No mai ita kontinua servisu hamutuk hodi konstrui Timor-Leste ida ne'ebé saudável, edukadu no prósperu.

Obrigadu barak.